



Nit ei Idee, dr Kopf isch lär
und bald isch Morgestraich
Das Värsliprünzle fällt is schwär,
s'chunt nit dr glainschti Saich.
Doch wo isch unsere Schnabelpryys ?
E bitzli subito!
Dr Obama het au ohni Nüt,
dr Nobäl-Pryys überkho

S`Federers die hän im Summer,
Zwilling überkho.
Die ganzi Wält het vo däm Wunder,
freudig Kenntnis gnoo.
Und wenn si d Bruscht bikömme
denn tuets ne schandbaar gfalle.
Obwohl si klai sin, hän si scho,
Fröid an Tennisballe.

ESozialarbeiter sait zum e andere,
ich han e schwere Fall.
Die ganz Familie fiert sich uff
wie im Schwainestall.
Der Vater isch GAGA, der Soon dä haut,
überall hets Wunde.
Erschweerend kunnt denn no derzu,
die läbe in Lybie unde.

Könne mir uns überhaupt,
die neue Kampfjet laische.
E günschtigi Lösig wär do besser,
dänke sich die maischte.
Drum schwäbt uns als Lösig vor,
vom Bryys här wär si fair.
Mir mache doch mit Eeschrtyych zämme,
e Kampfjet-Mobyliti-Air.

DFrau Meier, die hets schandbaar stressig,
und isch nit immer froo.
Männgmool muess si ire Alltag,
fluchtartig verloo.
Si meeditiert in der Glooschterzälle
fuurt vo allem Lutten und Schnälle.
Und das Joor tuet si im Glaibasel kuure,
zwische de friidlige Stüggi-Muure.

Was immer du uffs Päggli kläbsch,
der Poscht tuet`s nit pressiere.
Ob A-Poscht oder B-Poscht,
nüt duet dört funktioniere.
Doch letschti hämmer gsee,
die könne au pressiere,
wenn si ihri Verwaltigröt
per Luftposcht tien spediere.

Vom Schwimmbaad Rrynach in d Grien 80
fiert der Harasselauf.
Doch d Gmainde nämme jetzt dä Suffspoort,
ab däm Joor nimm in Kauf.
Könnt nid dä Birswääg als Rekord
im Guinnessbuech drin stoo,
und in als wältlengschts Pissoir
dört yytrage loo.

Dä Bäärezwinger z Bäärn isch luftig,
nimme alt und gruftig.
Für d Bääre hets dèert zwische de Hegge,
viil diskreeti Egge.
Si könne sich zämme, wenn si sich schämme,
ins Hyysli go versteppe.
Esoone grüümigs Biotoop
bruucht au der Bundesroot.

www.doolesuuger.ch



Wottschi au by uns bänggle?
Schigg doch aifach e Brief in unser Boschtfach
VSG Postfach 4365 4002 Basel
Oder goosch uff: www.vsg-basel.ch

Drugg: Discount Print H. Leidenfrost AG Basel